

CBETA電子佛典集成


CBETA Chinese Electronic Tripitaka Collection
eBook

T19n1022B

一切如來心祕密全 身舍利寶篋印陀羅 尼經

唐 不空譯

財團
法人 佛教電子佛典基金會



目次

- [編輯說明](#)
- [章節目次](#)
- [卷目次](#)
 - .001,
- [贊助資訊](#)

編輯說明

- 本電子書以「CBETA 電子佛典集成 Version 2023.Q4」為資料來源。
- 漢字呈現以 Unicode 3.0 為基礎，不在此範圍的字則採用組字式表達。
- 梵文悉曇字及蘭札字均採用羅馬轉寫字，如無轉寫字則提供字型圖檔。
- CBETA 對底本所做的修訂用字以紅色字元表示。
- 若有發現任何問題，歡迎來函 service@cbeta.org 回報。
- 版權所有，歡迎自由流通，但禁止營利使用。

特進試鴻臚卿大興善寺三藏沙門大廣智不空奉 詔譯

如是我聞：

一時佛在摩伽陀國無垢園中寶光明池，與大菩薩及大聲聞、天、龍、藥叉、犍闍婆、訶蘇羅、迦樓羅、緊那羅、摩睺羅伽、人非人等，無量百千前後圍遶。爾時眾中有一大婆羅門名無垢妙光，多聞聰慧人所樂見，常行十善歸信三寶，善心殷重智慧微細，常恆欲令一切眾生圓滿善利大富豐饒。時婆羅門無垢妙光從座而起，往詣佛所，遶佛七匝，以眾香華奉獻世尊，無價妙衣瓔珞珠鬘持覆佛上，頂禮雙足，却住一面，作是請言：「唯願世尊與諸大眾，明日晨朝至我宅中受我供養。」爾時世尊默然許之。時婆羅門知佛受請，遽還所住，即於夜間廣辦饒膳百味飲食，灑掃殿宇張施幡蓋。至明旦已，與諸眷屬持眾香華及諸妓樂至如來所，白言：「時至，願垂降臨。」爾時世尊軟語安慰彼婆羅門無垢妙光，遍告大眾，宣言：

「汝等皆應往彼婆羅門家攝受供養，為欲令彼獲大利故。」於時世尊即從座起，纔起座已從佛身出種種光明，間錯妙色照觸十方，悉皆警覺，然後趣道。時婆羅門以恭敬心持妙香華，與諸眷屬及天龍八部、釋梵四王，先行治道，奉引如來。爾時世尊前路不遠，中至一園名曰豐財。於彼園中有古朽塔，摧壞崩倒荆棘掩庭、蔓草封戶瓦礫埋隱，狀若土堆。爾時世尊逕往塔所。于時塔上放大光明照耀熾盛，於土聚中出聲讚言：「善哉善哉！釋迦牟尼！今日所行極善境界。又婆羅門！汝於今日獲大善利。」爾時世尊禮彼朽塔，右繞三匝，脫身上衣用覆其上，泫然垂淚涕血交流，泣已微笑。當爾之時，十方諸佛皆同觀視亦皆流淚，各所放光來照是塔。于時大眾驚愕變色，互欲決疑。爾時金剛手菩薩等亦皆流淚，威焰熾盛執杵旋轉，往詣佛所，白言：「世尊！此何因緣現是光相？何如來眼流淚如是？亦彼十方諸佛大瑞光相現前？唯願如來於此大眾解釋我疑。」時薄伽梵告金剛手：「此大全身舍利積聚如來寶塔，一切如來無量俱胝心陀羅尼密印法要今在其中。金剛手！有此法要在是中故，塔即變為重疊無隙如胡麻子俱胝百千如來之身。當知亦是如胡麻子百千俱胝如來全身舍利之聚，乃至八萬四千法蘊亦在其中，九十九百千萬俱胝如來頂相亦在其中。由是妙事，是塔所在之處，有大神驗殊勝威德，能滿一切世間吉慶。」

爾時大眾聞佛是說，遠塵離垢斷諸煩惱，得法眼淨。時眾機異利益亦別，須陀洹果、斯陀含果、阿那含果、阿羅漢果、辟支佛道，及

菩薩道、阿鞞跋致、薩波若智，於如是事各得其一，或有證得初地二地乃至十地，或有滿足六波羅蜜。其婆羅門遠塵離垢，得五神通。時金剛手見此奇特希有之事，白言：「世尊！妙哉奇異。但聞此事尚獲如是殊勝功德，況聞深理至心起信得幾功德？」佛言：「諦聽。汝金剛手！後世若有信男信女及復我等四部弟子，發心書寫此一經典，即准書寫九十九百千萬俱胝如來所說一切經典，即過於彼九十九百千萬俱胝如來之前久植善根，即亦彼諸一切如來加持護念猶如愛眼，亦如慈母愛護幼子。若人讀誦此一卷經，即為讀誦過去現在未來諸佛所說經典。由如是故，九十九百千萬俱胝一切如來應正等覺側塞無隙猶如胡麻重疊赴來，晝夜現身加持其人。如是一切諸佛如來無數恒沙，前聚未去後群重來，須臾推遷迴轉更赴，譬如細沙在水旋急，不得停滯迴去復來。若有人以香華塗香、華鬘衣服、微妙嚴具供養此經，即成於彼十方九十九百千萬俱胝如來之前，以天香華、衣服嚴具七寶所成積如須彌盡以供養，種植善根亦復如是。」爾時天龍八部人非人等聞是說已，各懷希奇，互相謂言：「奇哉威德！是朽土聚如來神力所加持故，有是神變。」金剛手復白佛言：「世尊！何因緣故，是七寶塔現為土聚？」佛告金剛手：「此非土聚，乃是殊妙大寶塔耳。由諸眾生業果劣故隱蔽不現。由塔隱故，如來全身非可毀壞，豈有如來金剛藏身而可壞哉？我若滅度，後世末法逼迫之時，若有眾生習行非法應墮地獄，不信三寶不植善根，為是因緣佛法當隱，然猶是塔堅固不滅，一切如來神力所持。無智眾生惑障覆蔽，徒朽珍寶不知採用，以是事故我今流淚，彼諸如來亦皆流淚。」復次佛告金剛手言：「若有眾生書寫此經置塔中者，是塔即為一切如來金剛藏率都婆，亦為一切如來陀羅尼心祕密加持率都婆，即為九十九百千萬俱胝如來率都婆，亦為一切如來佛頂佛眼率都婆，即為一切如來神力所護。若佛像中、率都婆中安置此經，其像即為七寶所成，靈驗應心，無願不滿；其率都婆，傘蓋羅網輪櫟露盤、德字鈴鐸、楹礎基階隨力所辦，或土或木若石若甄，由經威力自為七寶。一切如來於此經典加其威力，以誠實言不斷加持。若有有情能於此塔一香一華禮拜供養，八十億劫生死重罪一時消滅，生免災殃、死生佛家。若有應墮阿鼻地獄，若於此塔或一禮拜、或一右遶，塞地獄門、開菩提路。塔及形像所在之處，一切如來神力所護，其處不為暴風雷電霹靂所害，不為毒蛇虻蝮毒蟲毒獸所傷，不為師子狂象、虎狼野干、蜂蠆之所傷害，亦無藥叉、羅刹、部多、那毘舍，遮魑魅魍魎癩癩之怖，亦復不為一切寒熱諸病、癰癩癰疽、瘡疥疥癩所染。若人暫見是塔，能除一切災難。其處亦無人馬六畜、童子童女疫癘之患。不為橫死非命所夭。不為刀杖水火所傷、不為盜賊怨讎所侵、亦無飢饉貧乏之憂、

厭魅呪咀不能得便。四大天王與諸眷屬晝夜衛護、二十八部大藥叉將、日月五星、幢雲彗星晝夜護持，一切龍王加其精氣順時降雨，一切諸天與忉利天三時下來亦為供養，一切諸仙三時來集讚詠旋遶禮謝瞻仰，釋提桓因與諸天女晝夜三時來下供養，其處即為一切如來護念加持。由納經故，塔即如是。若人作塔以土石木金銀銅鉛，書此神呪安置其中，纔安置已其塔即為七寶所成，上下階級、露盤傘蓋、鈴鐸輪檜純為七寶，其塔四方如來形相，由法要故，一切如來堅住護持晝夜不去。其七寶塔全身舍利之妙寶藏，以呪威力，擢竦高至阿迦尼吒天宮之中，塔所串峙，一切諸天晝夜瞻仰守衛供養。」金剛手言：「何因緣故，此法如是殊勝功德？」佛言：「當知以此寶篋印陀羅尼威神力故。」金剛手言：「唯願如來哀愍我等，說是陀羅尼。」佛言：「諦聽，思念莫忘。現在未來一切如來分身光儀、過去諸佛全身舍利，皆在寶篋印陀羅尼，是諸如來所有三身亦在是中。」爾時世尊即說陀羅尼曰：

「那莫悉怛哩野(四合)地尾(二合)迦南(一) 薩婆怛他藥多喃(二) 唵(三) 部尾婆嚩娜嚩唎(四) 嚩者梨(五) 嚩者[齒*來](智皆反)(六) 祖嚕祖嚕馱囉馱囉(七) 薩嚩怛他藥多(八) 馱(引)靺梨鉢娜[牟*合](二合)婆嚩底(九) 惹也嚩梨(十) 畝怛梨(二合)薩磨(二合)囉(十一) 怛他藥多達磨斫迦囉(十二) 鉢羅(二合)鞞栗多(二合)娜嚩日羅(二合，梨音)胃地滿拏(十三) 楞迦囉(十四) 楞訖哩(二合)諦(十五) 薩嚩怛他(引)藥多地瑟恥(二合)諦(十六) 胃馱野胃馱野(十七) 胃地胃地(十八) 沒[亭*夜]沒[亭*夜](十九) 參胃馱爾參胃馱野(二十) 者囉者囉(二十一) 者懶都(二十二) 薩嚩嚩囉拏爾(二十三) 薩嚩播波尾藥諦(二十四) 戶嚕戶嚕(二十五) 薩嚩戍迦弭藥帝(二十六) 薩嚩怛他藥多(二十七) 紇哩(二合)娜野嚩日囉(二合)拏(二十八) 三婆囉三婆囉(二十九) 薩嚩怛他藥多(三十) 虞呬野(二合)馱囉拏畝涅梨(二合)(三十一) 沒怛蘇沒怛(三十二) 薩嚩怛他藥多(引)地瑟恥(二合)多(三十三) 馱靺藥陸娑嚩(二合)賀(三十四) 三摩耶(引)地瑟恥(二合)帝娑嚩(二合)訶(三十五) 薩嚩怛他藥多紇哩(二合)娜野馱靺畝捺犁(二合)娑嚩(二合)訶(三十六) 蘇鉢羅(二合)底瑟恥(二合)多薩靺(二合)閉怛他藥多地瑟恥(二合)帝戶嚕戶嚕吽吽娑嚩(二合)訶(三十七) 唵薩嚩怛他藥多(三十八) 塢瑟拏(二合)沙馱靺畝捺囉(二合)尼薩嚩怛他藥單娑馱靺尾部使多地瑟恥(二合)帝(三十九) 吽吽娑嚩(二合)訶(引)(四十)」爾時佛說是神呪已，諸佛如來自土聚中出聲讚言：「善哉善哉！釋迦世尊出濁惡世，為利無依無怙眾生演說深法。如是法要久住世間，利益廣多安穩快樂。」于時佛告金剛手言：「諦聽諦聽。如是法要神力無窮利益無邊，譬如幢上如意寶珠，常雨珍寶滿一切願。我今略說萬分之一，汝宜憶持利益一切。若有惡人死墮地獄，受苦

無間免脫無期。有其子孫稱亡者名，誦上神呪纔至七遍，洋銅熱鐵忽然變為八功德池，蓮生承足寶蓋駐頂，地獄門破菩提道開，其蓮如飛至極樂界，一切種智自然顯發，樂說無窮位在補處。復有眾生重罪報故，百病集身苦痛逼心，誦此神呪二十一遍，百病萬惱一時消滅，壽命延長福德無盡。若復有人慳貪業故生貧窮家，衣不隱身食不續命，[(禾*尤)/里]瘦衰蔽人所惡賤。是人慚愧入山折採無主搨華，若磨朽木持以號香，往至塔前禮拜供養，旋遶七匝流淚悔過，由神呪力及塔威德，滅貧窮報富貴忽至，七寶如雨無所闕乏。但當此時，彌飾佛法施與貧乏，若有悋惜財寶忽滅。若復有人為種善根隨分造塔，或泥或甌隨力所辦，大如菴羅高四指許，書寫神呪安置其中，持以香華禮拜供養。以其呪力及信心故，自小塔中出大香雲，香氣雲光周遍法界，薰馥晃曜廣作佛事，所得功德如上所說，取要言之無願不滿。若有末世四輩弟子善男善女，為無上道盡力造塔安置神呪，所得功德說不可盡。若人求福，至其塔所，一華一香禮拜供養右旋行道，由是功德官位榮耀不求自至，壽命富饒不祈自增，怨家盜賊不討自敗，怨念呪咀不厭歸本，疫癘邪氣不拔自避，善夫良婦不求自得，賢男美女不禱自生，一切所願任意滿足。若有烏雀鷄梟鳩鴿鷓鴣、狗狼野干蚊虻蟻螻之類，暫來塔影及踏場草，摧破惑障、覺悟無明，忽入佛家忝領法財。況有眾人或見塔形、或聞鐸聲、或聞其名、或當其影，罪障悉滅、所求如意，現世安穩、後生極樂。或人隨力以一丸泥塗塔壞壁、運一拳石扶塔墮傾，由此功德增福延壽，命終之後成轉輪王。若我滅後四部弟子，於是塔前濟苦界故供養香華，至心發願誦念神呪，文文句句放大光明，照觸三途苦具皆辟，眾生脫苦佛種牙萌，隨意往生十方淨土。若人往在高山峰上至心誦呪，眼根所及遠近世界山谷林野江湖河海，其中所有毛羽鱗甲一切生類，碎破惑障、覺悟無明，顯現本有三種佛性，畢竟安處大涅槃中。若與此人往過道路，或觸衣風、或踏其跡，或唯見面、或暫交語，如是等人重罪咸滅、悉地圓滿。」爾時佛告金剛手言：「今此祕密神呪經典付囑汝等，尊重護持流布世間，不令眾生傳受斷絕。」金剛手言：「我今幸蒙世尊付囑。唯願我等為報世尊深重恩德，晝夜護持流布宣揚一切世間。若有眾生書寫受持憶念不斷，我等摩催釋梵四王、龍神八部，晝夜守護不暫捨離。」佛言：「善哉！金剛手！汝為未來世一切眾生大利益故，護持此法令不斷絕。」爾時世尊說此寶篋印陀羅尼廣作佛事，然後往彼婆羅門家受諸供養，令時人天獲大福利，却還所住。爾時大眾，比丘、比丘尼、優婆塞、優婆夷、天、龍、夜叉、犍闥婆、阿修羅、迦樓羅、緊那羅、摩睺羅伽、人非人等，皆大歡喜，信受奉行。

此經與大明藏興函儀軌離部第八、不空所譯《寶篋印陀羅尼經》同本，而其異不少也。此本者，遍照金剛及慈覺智證三師之請來，文義通暢也。先亮汰和上註此本行天下，今因刻諸軌，更標藏本之異於冠，以上木。

享和改元辛酉仲秋月

豐山勤息 快道 誌

享和癸亥三月二十八日一校加筆畢

慈順

[CBETA 贊助資訊](https://www.cbeta.org/donation/index.php)

[.\(https://www.cbeta.org/donation/index.php\)](https://www.cbeta.org/donation/index.php)

CBETA 成立於 1998 年，於 2023 年 8 月 7 日轉型成為基金會。成立多年來，一部部佛典在嚴謹控管中轉換為數位典藏，不只數量龐大，而且文字校訂精確可信，又加新式標點方便閱讀。「CBETA 電子佛典集成」不僅獲得國際學界的重視及肯定，也成為大眾廣為運用的公共資源，如此成果都是在廣大信眾及有識之士的支持下才得以實現。

對一個從事佛法志業的非營利團隊，能夠長期埋首理想、踏實耕耘是非常不容易的。如今，CBETA 運作經費日漸拮据，但「佛典集成」仍有許多未竟之功。因此，懇請大家慷慨解囊、熱情贊助，讓未來有更多更好的電子佛典。

您的捐款本會皆會開立收據，此收據可在年度中申報個人或企業的綜合所得稅減免。感恩諸位大德的善心善行，以及您為佛典電子化所做的一切貢獻。

信用卡線上捐款

本線上捐款與 netiCRM 及 NewbPay 藍新金流合作，資料傳送採用 SSL (Secure Socket Layer) 傳輸加密，讓您能夠安全安心地進行線上捐款動作。

不管您持有的是國內或國外卡，所有捐款最終將以新台幣結算，所以我們所開立的捐款收據也將以新台幣計。

線上刷卡支持定期定額與單筆捐款。(銀聯卡不支援定期定額)

[前往捐款](#)

劃撥捐款

郵政劃撥帳號：5 0 4 6 8 2 8 5

戶名：財團法人佛教電子佛典基金會

欲指定特殊用途者，請特別註明，我們會專款專用。

線上信用卡 / PayPal 捐款

PayPal 是一個跨國線上付款機制的公司，CBETA 引用其服務，提供網友能在線上使用信用卡或 PayPal 帳戶贊助 CBETA 。

PayPal is an online system of a global payment solution. CBETA uses its service to provide the uses to donate by using the credit cards or PayPal account to support the CBETA project .

相關收據開立事宜，由於付款幣別為美元，我們除了會依您所贊助之美元金額開立收據外，另我們會依捐款當日公告匯率開立台幣收據，此收據為國內正式合法報稅憑證。

Since the donation made is in US currency, hence all the receipts will be issued in the US dollars consequently. However for the domestic donators, a Chinese official receipt will also be made according to the foreign exchange rate for the purpose of tax deduction.

[線上信用卡 / PayPal 贊助](#)

支票捐款

支票抬頭請填寫「財團法人佛教電子佛典基金會」。

For donations by check, please write the check to
"Comprehensive Buddhist Electronic Text Archive
Foundation".
